



# «Cunter immigraziun da massa»: Supportabel per la muntogna

■ **La regenza grischuna s'engascha en la conferenza da las regenzas chantunales per che l'iniziativa federala dal pievel «Cunter l'immigraziun da massa» vegnia realisada en ina moda ch'è supportabla per las regiuns da muntogna.** Uschia tegna ella er quint dals quitads da l'Engiadina e dal Grischun dal sid. Plinavant ha la regenza concedì differentas contribuziuns ed ella ha fixà la repartiziun dals daners da cultura supplementars ch'eran vegnids concludids dal cussegl grond per l'onn 2014.

## Il chantun s'engascha en la CdC

La regenza ha prendì enconuschientscha dals quitads da las presidentas e dals presidents communal da l'Engiadina e dal Grischun dal sid suenter l'acceptaziun da l'iniziativa dal pievel «Cunter l'immigraziun da massa». En ina brev a la regenza sco er a la commembra ed als commem-

bers grischuns da l'assemblea federala plenara han els exprimì lur quità che cunzunt las regiuns perifericas e da cunfin sajan pertutgadas d'ina restricziun futura da la libra circulaziun da persunas.

Sco quai che la regenza scriva en sia risposta a la brev è ella conscianta da la muntada da l'iniziativa e da las consequenzas gravantas pussaivlas per la Svizra e per il chantun Grischun. Correspundentamain vegn la regenza a s'engaschar – en il rom da sias pussaivladads – energicamain per ils basegns dal chantun. Per quest intent vegn ella a s'engaschar en emprima lingua en la conferenza da las regenzas chantunales (CdC) nua ch'ella è represchentada cun la cussegliera guvernativa *Barbara Jannom Steiner* en il comité directiv. A la radunanza plenara da la CdC dals 21 da mars 2014 sa laschan las regenzas chantunales infurmar directamain dal cussegl federal per lura sa fatschentar da la chaussa.